

He
whakarā-
popotanga

Te whakairo i tētahi pūnaha mātauranga kaha ake i te taha o te iwi o Aotearoa

He whakawhitiwhiti kōrero mō Ngā Kaupapa Matua ā-Motu mō te Mātauranga me te Ako hukihuki me te Rautaki Mātauranga Matua

He nui ngā āhuatanga e ngākau whakahī ai tātau o Aotearoa e pā ana ki tā tātau pūnaha mātauranga. Me kī he pai tonu te mahi a ā tātau ākongā i te taha o ngā paerewa o te ao o te angitu i roto i te mātauranga, ā, he ākongā, he kaiako hoki ā tātau e eke ana ki ngā mea papai i te ao katoa. Kei mua tō tātau rāngai mātauranga arareo Māori i roto i te mātauranga iwi taketake, ā, he wāhanga hira tōna i roto i te whakarauoratanga o te reo Māori me ngā tikanga Māori.

I rongo kōrero mātau mai i ngā tāngata o Aotearoa mā te Kōrero Mātauranga, ngā hui taumata mātauranga, me ngā whakawhitiwhiti kōrero hāngai, ko te oranga, ōritenga me te whakaurunga ngā mea tino hira mō ngā ākongā me ō rātau whānau, engari kāore tā tātau pūnaha onāiane i te tuku i tēnei mō te katoa.



Te Kaupapa Mahi Mātauranga me te Kōrero Mātauranga

Kei te whai tēnei Kāwanatanga i tētahi kaupapa takahuri nui puta noa i te pūnaha mātauranga kia pai ai te tautoko i ngā ora pai ake mō ngā tangata katoa o Aotearoa. Mō te wā tuatahi, kei te whai mātau i tētahi ara kōmitimiti hei whakatakoto i te aronga mō te pūnaha mātauranga, mai i ngā kaiwhakarato mātauranga kōhungahunga, atu ki te rāngai kura whakature, tae noa ki te mātauranga matua me te whakangungu.

I te tīmatanga o te tau 2018, i tīmata ngā ākongā, mātua, ngā kaituku mahi, iwi, ngā hapori, kaiwhakaako, me te Kāwanatanga ki te kōrero mō ngā hiahia o Aotearoa ināiane, ā haere ake, ka mutu me pēhea te whakatutuki i tēnei.

Kua tīmata kē mātau ki te huri i te pūnaha mātauranga, mā te whai i ngā rautaki e whai ake:

- » Ka Hikitia – te ratonga Mātauranga mā te Māori
- » Te Mahere Mahi Mātauranga mā Te Moananui-a-Kiwa
- » Te Rautaki Ohu Mahi Mātauranga
- » Te Arotake i Ngā Kura mō Āpōpō
- » Te Rautaki Mātauranga ā-Ao
- » Te Whakahou i te Mātauranga Ahumahinga
- » He taonga te tamaiti – He mahere rautaki mō ngā akoranga kōhungahunga

Matakitenga mō te mātauranga:

I whakaae te Kāwanatanga ki te whakawhanake i tētahi ara 30 tau ukiuki ki te mātauranga i Aotearoa. I hangaia e Ngā Kaitiaki o te Kōrero Mātauranga tēnei matakitenga e whai ake, e ai ki ngā whakaaturanga i kohia mā te Kōrero Mātauranga, hei whakatinana i ngā mea hiahia ana te iwi o Aotearoa i roto i tā tātau pūnaha mātauranga:

Whakamaua te pae tata kia tina...

He uri tātau nō ngā kaihōpara, kaitūhura me ngā kaihangā auaha i whakamahi i ō rātau mōhio hei tāwhai i ngā paerangi mamao. He wairua manaaki, ōrite, tūhonohono te āhua o ā tātau akoranga kia anga whakamaua ai me te nanao atu i ngā hua mō ō tātau iwi me ngā huarahi anamata, āhuatanga hoki ka whāia e rātau.

Whāia te pae tawhiti kia tata!

E paiherea ana te matakitenga i roto i ngā wawata o ngā tāngata o Aotearoa mō te mātauranga – kia āhei ai ia tangata o Aotearoa ki te ako me te eke ki ngā taumata, te āwhina i tōna whānau me ngā hapori kia momoho, me te waihanga i tētahi ōhanga whaihua, toitū me tētahi iwi tuwhera, manaaki hoki.

He aha Ngā Kaupapa Matua ā-Motu mō te Mātauranga me te Ako hukihuki me te Rautaki Mātauranga Matua?

He huinga kaupapa matua te Te Tauākī o Ngā Kaupapa Matua ā-Motu mō te Mātauranga me te Ako (NELP) me te Rautaki Mātauranga Matua (TES) hei whakatinana i roto i ngā wāhi ako, mai i te akoranga kōhungahunga tae noa ki te mātauranga matua me te whakangungu. He tuhinga ā-ture te NELP me te TES i whakamanahia e te Ture Mātauranga 1989 me te whakapuaki i ngā tūmanako o te Kāwanatanga mō ngā wāhi ako hei hāpai i te oranga, oritenga me te whakaurunga ki te mātauranga.

Me mātua whai whakaaro te hunga kei ngā tūranga poari whakahaere o te rāngai akoranga kōhungahunga me te mātauranga whakature ki ngā kaupapa matua a NELP. Me mātua whakamana Te Amorangi Mātauranga Matua i te TES, ā, me mātua whai whakaaro mai Te Mana Tohu Mātauranga o Aotearoa ki tēnei. Me mātua whakaatu Ngā Whakahaere Mātauranga Matua ka pēhea tā rātau tautoko i te whakatutukitanga o ngā kaupapa matua e rārangi ana i te TES mā ngā mahere haumitanga.

E toro ana tēnei hukihuki o te NELP me te TES ki ngā karere mā te Kōrero Mātauranga, ā, ngā whakawhitiwhiti kōrero hāngai me ngā tamariki me ngā taiohi me te hunga whai pānga mai o te mātauranga matua.

I tua atu i tēnei whakawhitiwhiti whakaaro, he whāngai anō ngā whakaaturanga mō te āhua o te whakatutuki a te pūnaha mātauranga ki te NELP me te TES hukihuki, me ngā mea ka taea e ngā kaiwhakarato me ngā kaiwhakaako te mahi e tino whitake ai mō ngā ākonga me ō rātau whānau.

Ngā Whāinga mō te mātauranga

I te tīmatanga o te 2018 i whakatakotoria e te Kāwanatanga ana whāinga mō te kaupapa mahi mātauranga – kua whakahoutia ēnei hei whakauru mai i ngā kōrero a ngā tāngata o Aotearoa ki a mātau mō ngā mea hira ki a rātau.

Ka whakatakotohia e ngā whāinga mō te mātauranga te horopaki mō te NELP me te TES me te whakarārangi i ngā mea ka arotahi atu te Kāwanatanga hei whakapai ake i ngā putanga me te oranga puta noa i te pūnaha mātauranga.

Whāinga Tuatahi: Ko ngā ākonga kei te iho – ko ngā ākonga me ō rātau whānau kei te iho o te mātauranga

- » Kua whiria te oranga ki te akoranga.
- » Kua rawa te ākonga me tōna whānau e pā ki ngā momo āhuetanga katoa o te whakaweti, kaikiri me te nonotitanga.
- » Me rapu, me whakarongo hoki ki te reo o ngā ākonga, ngā whānau me ō rātau hapori.

Whāinga tuarua: Kāore he tauārai i roto i te matauranga – ka taea ngā whai wāhitanga me ngā putanga rawe mō ia ākonga

- » Me wātea, me whai hua hoki te mātauranga ki te katoa. Ko ngā tauārai e aukati ana i te whai wāhi whānui o ngā ākonga i roto i te mātauranga, tae atu ki ngā tauārai pūtea, ā-kikokiko hoki, me whakaiti, kia ōrite ai te āhei atu o ngā ākonga ki ngā whai wāhitanga me ngā putanga.

Whāinga Tuatoru: Ngā whakaakoranga me te kaiārahi kounga – ko te kounga o ngā whakaakoranga, kaiārahi hoki te mea whitake mō ngā ākonga me ō rātau whānau

- » E hiahia ana ngā kaiako kanorau, whai pūkenga nui, hihiri hoki hei whakatinana i ngā tikanga e tino whitake ai ki ngā ākonga.
- » Me mātua waihanga i ngā kaiārahi kounga i ngā taumata katoa o te pūnaha kia puta ai ngā panonitanga pai, me te whakarei ake i ngā akoranga kounga o ia rā.

Whāinga Tuawhā: Te anamata o ngā akoranga me ngā mahi – ngā akoranga e hāngai ana ki ngā ao o ngā tāngata o Aotearoa i tēnei rā, ā, puta noa i ō rātau rā

- » Me uru ngā ākonga ki te mātauranga e taea e rātau ngā whai wāhitanga hurihuri te whai me ngā whakapātari o te anamata o ngā mahi. Ko te kirirautanga, ngā ara ki te mahi me ngā akoranga pūmau ngā wāhanga hira o tēnei.
- » Mō ngā ākonga Māori, ko te tikanga o tēnei ko te whai pūkenga kia whai wāhi ai ki te ao Māori, ki te iwi whānui o Aotearoa me te horopaki ao whānui.

Whāinga Tuarima: Mātauranga tūmatanui taumata tiketike tuwhera – e pono ana, e toitū ana te mātauranga o Aotearoa

- » Me nui te pono, urutau, urupare hoki o te pūnaha mātauranga ki ngā hiahia o ngā ākonga katoa me tō tātau ao hurihuri. Me mātua whakaute te mātauranga me ngā rangahau o Aotearoa e te ao whānui, ā, me te tautoko i ngā pātuitanga Māori-Karauna.
- » Me whakaata anō te pūnaha mātauranga i te tino rangatiratanga – te āhei o te Māori ki te whakahaere i āna whakahaere mātauranga anō, ā, kia whakamanatia ki te rapu i ngā rongoā nā te Māori mā te Māori.

Te Tauākī o Ngā Kaupapa Matua ā-Motu mō te Mātauranga me te Ako:

E whakapuaki ana te NELP i ngā kaupapa matua a te Kāwanatanga mō te mātauranga i roto i te rāngai akoranga kōhungahunga me te akoranga kura whakature. Ka āwhina ngā kaupapa matua NELP i te hunga kei runga i ngā poari whakahaere i ngā kura, ngā ratonga akoranga kōhungahunga me ngā kōhanga reo kia arotahi ā rātau mahi o ia rā ki ngā mea ka tino whai pānga nui ki ngā ākonga.

Ko te hunga kei ngā tūranga poari whakahaere o ngā wāhi ako, me ngā poari kaitiaki me ngā kaipupuri raihana pokapū akoranga kōhungahunga, kei a rātau te kawenga me te paetata mō te whakatinana i te NELP.

Kia mōhio mai: kāore i whakarārangihia ngā kaupapa matua e ai ki te hiranga, manakohanga rānei.

Te Tauākī o Ngā Kaupapa Matua ā-Motu mō te Mātauranga me te Ako – ngā kaupapa matua e marohitia ana:

Hei whakatutuki i ia whāinga mō te mātauranga, ko ngā ratonga akoranga kōhungahunga me ngā kura me mātua:

Whāinga Tuatahi: Ko ngā ākonga kei te iho – ko ngā ākonga me ō rātau whānau kei te iho o te mātauranga

1 Whakarite kei te rongo ākonga i te wairua haumarū, manaaki me te whakauru mai mō ō rātau ake āhua, tae atu ki te tuakiritanga, reo, ahurea hoki me ngā hiahia ako.

2 Whakauru mai i te whānau hei pātui hira ki ngā akoranga me ngā whakatutukitanga o ia ākonga.

Whāinga tuarua: Kāore he tauārai i roto i te matauranga – ka taea ngā whai wāhitanga me ngā putanga rawe mō ia ākonga

3 Whai tūmanako teitei mō ia ākonga me te whakakore atu i ngā tikanga e whakawhāiti ana i te urunga ki te marautanga.

4 Te tautoko i ngā whakawhitinga angitu atu, i roto, mai i ngā wāhi ako.

5 Whakarite kāore ngā tauārai pūtea me ētahi atu tauārai mō ngā ākonga me ō rātau whānau i te aukati i te urunga ōrite ki ngā whakaakoranga, akoranga me te whakauru ki te ao o ngā akoranga kōhungahunga, kura rānei.

Whāinga Tuatoru: Ngā whakaakoranga me te kaiārahi kounga – ko te kounga o ngā whakaakoranga, kaiārahi hoki te mea whaitake mō ngā ākonga me ō rātau whānau

6 Whakatipu i te ohu mahi ki te whakakaha i ngā whakaakoranga, kaiārahi hoki me te tautoko i tētahi umanga puta noa i te pūnaha.

7 Whakauru i te reo Māori me ngā tikanga Māori ki ngā pito katoa o te ora o te wāhi ako.

Whāinga Tuawhā: Te anamata o ngā akoranga me ngā mahi – ngā akoranga e hāngai ana ki ngā ao o ngā tāngata o Aotearoa i tēnei rā, ā, puta noa i ō rātau rā

8 Whakarite kei te tuku rātau i ngā akoranga e mārama ai ngā ākonga ki ngā tuakiri ahurea o Aotearoa me tō tātau hītori.

Whāinga Tuarima: Mātauranga tūmatanui taumata tiketike tuwhera – e pono ana, e toitū ana te mātauranga o Aotearoa

9 Whakawhanake i ngā hononga me tō rātau iwi, hapū, hāpori hoki kia hāngai ai ngā tūmanako me ngā whakaritenga ahunga rautaki.



Te Rautaki Mātauranga Matua:

E whakatakoto ana te TES i te ahunga rautaki wā roa me ngā kaupapa matua a te Kāwanatanga mō te pūnaha mātauranga matua. Me mātua whakamana Te Amorangi Mātauranga Matua i te TES, ā, me mātua whai whakaaro mai Te Mana Tohu Mātauranga o Aotearoa ki ērā. Me mātua whakaatu Ngā Whakahaere Mātauranga Matua ka pēhea tā rātau tautoko i te whakatutukitanga o ngā kaupapa matua e rārangi ana i te TES mā ngā mahere haumitanga.

Ko te whāinga o ngā kaupapa matua 13 e marohitia ana i roto i te TES hukihuki he whakarite i te ōrite o ngā putanga mō ngā ākonga katoa, otirā mō ngā ākonga Māori me ō Te Moananui-a-Kiwa me te hunga whai matea tautoko ako, kāore i te tino tautokona e te mātauranga matua. Ka whai anō ēnei kaupapa matua ki te whakarite kei te noho whakarawe te rāngai mō te āhuetanga hurihuri o te mahi, ā, he whakamana i ngā ara mahi mārama, whitake hoki me ngā whai wāhitanga akoranga pūmau.

Kia mōhio mai: kāore i whakarārangihia ngā kaupapa matua e ai ki te hiranga, manakohanga rānei.

Te Rautaki Mātauranga Matua – ngā kaupapa matua e marohitia ana:

Kia tutuki ai ia whāinga mō te mātauranga, mātauranga matua, me mātua:

Whāinga Tuatahi: Ko ngā ākonga kei te iho – ko ngā ākonga me ō rātau whānau kei te iho o te mātauranga

1 Whakarite he haumarū, he tuwhera, he urupare ngā wāhi mātauranga matua, he tuwhera anō hoki.

Whāinga tuarua: Kāore he tauārai i roto i te matauranga – ka taea ngā whai wāhitanga me ngā putanga rawe mō ia ākonga

2 Mārama me te urupare te pūnaha ki ngā hiahia me ngā wawata o ngā ākonga.

3 Waihanga i ngā ara mārama e tautokona ana kia taea ai e ngā ākonga ō rātau wawata te whakatutuki.

4 Waihanga i ngā tūmomo kōwhiringa mātauranga rerekē me ngā tauira whakarato kia taea ai ngā akoranga pūmau.

Whāinga Tuatoru: Ngā whakaakoranga me te kaiārahi kōunga – ko te kōunga o ngā whakaakoranga, kaiārahi hoki te mea whitake mō ngā ākonga me ō rātau whānau

5 Haumi ki ā rātau kaimahi mā ngā āhuetanga e whakakaha ana i ā rātau tikanga me te whakahāngai ki ngā hiahia o ngā ākonga, ahumahi, kaituku mahi me ngā hapori.

6 Whakauru i te reo Māori me ngā tikanga Māori ki ngā pito katoa o te ora o te wāhi ako.

7 Tuku i ngā whakaakoranga me ngā akoranga e hāngai ana ki ngā ahurea me te tangata.

Whāinga Tuawhā: Te anamata o ngā akoranga me ngā mahi – ngā akoranga e hāngai ana ki ngā ao o ngā tāngata o Aotearoa i tēnei rā, ā, puta noa i ō rātau rā

8 Neke i te arotahi o te whakaako me te ako ki ngā wāhi mahi.

9 Whakaaroaro anō mō ngā mea e whakaako ana tātau me te ako mō te āhua hurihuri o te mahi.

10 Tuku i ngā tohutohu ara mahi whitake, mōhiohio hoki.

11 Whakatenatena i ngā TEO me ngā kaituku mahi ki te mahi ngātahi ki te whakapakari ake i ngā pūkenga o ngā kaimahi onāiane.

Whāinga Tuarima: Mātauranga tūmatanui taumata tiketike tuwhera – E pono ana, e toitū ana te mātauranga o Aotearoa

12 Āhukahuka me te uara i tō tātau tuakiri ā-motu ahurei.

13 Hāpai ake i te tuku tautoko a ngā rangahau ki te oranga o Aotearoa.



Kei te hiahia mātau i ō whakaaro mō tēnei

I pātaihia koe mā te Kōrero Mātauranga he aha ō whakaaro mō ngā kaupapa matua mō te pūnaha mātauranga. I whāngai ō kōrero me ngā whakaaturanga mō te āhua o te whakatutuki a te pūnaha, i te whanaketanga o ēnei kaupapa matua.

Ko te hiahia ināianei ko te tiroiro i whakaata tikahia e mātau ō whakaaro me ō māharahara i roto i ngā kaupapa matua o NELP me te TES. Kia mōhio mai, kāore tātau i te whakawhitiwhiti kōrero mō te matakitenga, ngā whāinga rānei o mō te mātauranga.

Kua tīmata ngā whakawhitiwhiti kōrero mō te NELP me te TES, ā, ka kati mō te TES hei te mutunga o Whiringa-ā-nuku, ā, mō te NELP hei te mutunga o Whiringa-ā-rangi. Ka taea e koe te tuku whakaaro mā ngā rangahau tuihono, ngā tāpaetanga, pāpāho pāpori, me ngā whakawhitiwhiti kōrero kanohi ki te kanohi hāngai.

Ngā hāngai ki ngā rangahau

E wātea ana ngā rangahau tuihono mō ngā kaupapa matua mō te NELP me te TES hei whakaoti māu i konei:

<https://conversation.education.govt.nz/conversations/shaping-a-stronger-education-system-for-all/>

Ngā taipitopito mō ngā tāpaetanga

Kei te hiahia anō mātau i ngā tāpaetanga mō ngā kaupapa matua, ka taea te tīmēra ki: NELP.TES@education.govt.nz

Kei te hiahia mōhiohio atu anō koe?

Ngā hono ki ngā mōhiohio atu anō mō te NELP

Kei konei ngā whakaaturanga poto i hangai hei whāngai i ngā kaupapa matua hukihuki mō te NELP:

<https://conversation.education.govt.nz/conversations/national-education-and-learning-priorities/evidence-briefs/>

*E wātea anō te *Treat kids like they're gold*, te whakarāpopototanga o ngā whakawhitiwhiti kōrero hāngai o te tau 2018 me ngā tamariki me ngā taiohi, i konei:*

<https://conversation.education.govt.nz/conversations/national-education-and-learning-priorities/what-you-told-us/>

Ngā hono ki ngā mōhiohio atu anō mō te TES

Tirohia te paetukutuku mō ngā pūrongo whakawhitiwhiti, te tuinga matapakinga me ngā whakaaturanga poto i konei:

<https://conversation.education.govt.nz/conversations/tertiary-education-strategy/>

He pātai?

Mēnā he pātai āu whakapā atu ki a: NELP.TES@education.govt.nz

Kōrero

Mātauranga

Me kōrero tātau

Have your say about
the future of education.

Join the conversation at
conversation.education.govt.nz



#EdConvo



